



KOMUNIKADO PA PRENSA

Fecha

11 desèmber 2019

Persona di kontakto

Juaqila Poulo

Email

juaqila.poulo@gobiernu.cw

Tur persona ku tin un pèrmit pa transporte hende kontra pago tin ku tene nan mes na regla

Willemstad – Tur persona ku tin un pèrmit pa transporte hende kontra pago tin ku tene nan mes na e reglanan stipulá den nan pèrmit. Ministerio di Tráfiko, Transporte i Planifikashon Urbano (VVRP) a tuma nota resientemente di personanan ku no ta tene nan mes na regla. Ta hasi uso di shofùr ouksiliar siendo ku e shofùr mes ta den ful kapasidat pa por transportá hende, i a nota ku ta kompartí plachi di number ku mas vehíkulo. Esaki no por i VVRP ta urgí tur hende pa mantené nan mes na regla. Si topa hendenan ku ta violá e lei eksistente lo tuma pasonan severo kontra di nan, i mester tene kuenta ku tur e konsekuenshanan ku esaki ta trese kuné.

Un persona ku tin un pèrmit pa transportá hende kontra pago mes tin ku transportá pasahero den e vehíkulo asigná pa hasi esaki. E vehíkulo aki mester tin su plachi di number asigná segun e pèrmit, dilanti i patras buta na su vehíkulo. Esaki ta segun nos leinan di tráfiko i di “motorrijtuigenbelasting”. Si esaki no ta e kaso, e persona por haña un but pa mal uso di plachi di number, i ta kore rísiko ku ta revoká su pèrmit. No por tin dos vehíkulo ta kore mesun plachi di number. Otro punto ta ku shofùrnan ta kore e vehíkulo sin ku ta hasi uso di e plachinan di number ku korekto.

Banda di esaki, e persona ku tin e pèrmit, no por uso shofùr ouksiliar (“hulpbestuurder”) si e mes por transportá hende. Den kasonan eksepsional (por ehèmpel malesa), por hasi uso di un shofùr ouksiliar. No ta e intenshon pa esun ku tin e pèrmit ta usa e shofùr ouksiliar manera un trahadó di dje. Si e persona ku tin e pèrmit tin kapasidat di manehá e vehíkulo, e mes mester hasi esaki.

Esnan ku ta kometé infrakshon kontra di e lei di transporte i/òf e pèrmit, ta kore e rísiko ku sea ta suspendé òf revoká su pèrmit. E komportashon aki no ta aseptabel. Si mester opservá un kontinuashon di e komportashonnan ariba menshoná, lo usa e instrumentonan nesesario pa suspendé i/òf revoká e pèrmitnan.